

दिनांक 31.08.2025
समय: 18.45 बजे
आकाशवाणी जयपुर-अजमेर
प्रादेशिक समाचार

- प्रधानमंत्री नरेन्द्र मोदी आकाशवाणी सू मन की बात कार्यक्रम मांय कह्या— देश ने वोक्ल फॉर लोकल रा मंत्र रे सागे आत्मनिर्भर भारत रा लक्ष्य री कानी और आगे बढ़नो चाहिजे।
- राज्य विधानसभा रा काल सू सुरू होबा वाळा सत्र सू पैली आज राज्य मंत्रिमण्डल री बैठक मांय केई महताऊ फैसला कर्या गया।
- प्रदेश मांय मानसून री सक्रियता सू केई ठौड़ां माथे बारिश रो दौर जारी— आज सिरोही, पाली अर जालौर जिलां खातर भारी बारिश रो ऑरेंज अर 26 जिलां मांय येलो अलर्ट जारी।
- फिट इण्डिया कार्यक्रम रे तैत आज देशभर मांय सण्डे ऑन साईकिल कार्यक्रम राख्यो गयो—प्रदेशभर मांय भी केई ठौड़ां साईक्लोथॉन मांय आमजन रे सागे जनता रा नुमाइन्दा भाग लीना।

प्रधानमंत्री नरेन्द्र मोदी कह्या के देश ने थानीय उत्पादन ने बढ़ावो देबा खातर वोक्ल फॉर लोकल, आत्मनिर्भर भारत अर विकसित भारत रा मंत्र रे सागे आगे बढ़नो चाहिजे। आज आकाशवाणी सू मन की बात कार्यक्रम मांय वे कह्या के देशवासियां ने स्वदेशी ने ध्यान मांय राखाणो चाहिजे।

प्रधानमंत्री कह्या के त्यौहारां री खुशियां रे बीच साफ-सफाई ने ध्यान मांय राखणो चाहिजे क्योंकि इण सू त्यौहारां रो आनन्द और भी बढ़ जावे है। वे कह्या के एक भारत-श्रेष्ठ भारत री भावना देश रा विकास खातर जरूरी है इण मांय खेलां री बड़ी भूमिका है। प्रधानमंत्री कह्या के मॉनसून रे दौरान प्राकृतिक आपदावां देश ने कसौटी माथे कस री है। लारला कुछ एक हफ़तां मांय देश बाढ़ अर भूकंप रो बड़ो कहर देख्यो है। श्री मोदी कह्या के संकट री इण घड़ी मांय थानीय लोग, सामाजिक कार्यकर्ता, डॉक्टर अर प्रशासन हर भांत री कोशिश करी है। ।

प्रधानमंत्री डिजिटल ऐप प्रतिभा सेतु री भी चर्चा करी।

श्री मोदी कहा के सौर ऊर्जा काश्तकारां रा जीवन मांय बड़ो बदळाव ला री है। प्रधानमंत्री उण काश्तकारां रो जिक कर्या जो सौर ऊर्जा सू खुद रे सागे आरे-सारे भी घणो बदळाव लाया है। प्रधानमंत्री कह्या के रामायण अर भारतीय संस्कृति री कानी प्रेम अबै दुनिया रा हर एक कोना मांय बढ़ रह्यो है। वणा इटली मांय महर्षि वाल्मीकि अर कनाडा मांय भगवान श्रीराम री प्रतिमावां रा अनावरण रो भी जिक कर्या। प्रधानमंत्री आवता म्हीना मनाई जाबा वाळी महान विभूतियां री जयंती रा बारा मांय कह्या के 15 सितम्बर ने भारत रा महान

इंजीनियर एम. विश्वेश्वरैय्या रो जन्मदिन है जिण ने इंजीनियर दिवस रा रूप मांय मनायो जावे है। वटे ही 17 सितंबर ने विश्वकर्मा जयंती है। श्री मोदी बताया के ओ दिन विश्वकर्मा बंधुआं ने समर्पित है जो परंपरागत शिल्प, कौशल अर ज्ञान—विज्ञान ने लगातार एक पीढ़ी सूं दूजी पीढ़ी ताई पूगा रह्या है।

प्रदेश मांय भी प्रधानमंत्री नरेन्द्र मोदी रा 'मन की बात' कार्यक्रम ने लेर खासो उछाव निजर आयो। मुख्यमंत्री भजनलाल शर्मा जयपुर मांय आप रा रहवास माथे मन की बात कार्यक्रम सुण्या।

वठिने जैसळमेर जिला रा सीमा डेरा हलका तनोट मांय उपमुख्यमंत्री दिया कुमारी बीएसएफ रा जवानां रे सागे मन की बात कार्यक्रम ने सुण्या। पाली अर सवाईमाधोपुर समेत न्यारा—न्यारा जिलां मांय भी भाजपा कार्यकर्ता अर और आमजन मन की बात कार्यक्रम ने सुण्यो।

16वीं राज्य विधानसभा रो चौथा सत्र काल सूं सरू व्हेला। इण सत्र मांय केई महताऊ विधेयक राख्या जावेला। इण सूं पैली आज जयपुर मांय मुख्यमंत्री भजन लाल शर्मा री अगुवाई मांय राज्य मंत्री मण्डल अर मंत्रिपरिषद री बैठक व्हे री है। बैठक रे पाछे उपमुख्यमंत्री प्रेमचन्द बैरवा, संसदीय कार्यमंत्री जोगाराम पटेल अर खाद्य अर नागरिक आपूर्ति मंत्री सुमित गोदारा बैठक मांय लिया गया फैसला री जाणकारी दी। प्रेमचन्द बैरवा ने कह्या के शहरां रा सीवरेज सिस्टम ने सुधारबा खातर राष्ट्रीय सीवरेज अपशिष्ट जल नीति 2016 मांय संशोधन ने बैठक मांय मंजूरी दी गई। वे कह्या के स्वच्छ भारत मिशन री अवधारणा रे तैत शहरी सीवरेज सिस्टम ने बेहतर बणायो जावेला।

संसदीय कार्यमंत्री जोगाराम पटेल कह्या के धर्मांतरण संबंधी विधेयक ने विधानसभा मांय राख्या जावेला।

मुख्यमंत्री भजनलाल शर्मा आज जयपुर जिला रा दूदू मांय न्यारा—न्यारा विकास कामां रो लोकार्पण कर्या अर नीव राखी। इण मांय दूदू विधानसभा हलका मांय करीब 20 करोड़ रिप्यां री लागत सूं स्कूलां ने बणावा, सड़क बणावा, मरम्मत अर भवन निर्माण कामा अर करीब साढ़े 10 करोड़ रिप्यां री लागत सूं बण्या सामुदायिक स्वास्थ्य केंद्र अर उप स्वास्थ्य केंद्र शामिल है। इण मौके मुख्यमंत्री आमजन सूं वोकल फॉर लोकल ने बढ़ावो देवा ने कह्या।

वणा कह्या की राज्य सरकार काश्तकारां रा हित मांय लगातार महताऊ फैसला ले री है वां खातर कम ऊं कम समर्थन मूल्य मांय लगातार बढ़ोतरी करी जा रही है। इण मौके उपमुख्यमंत्री डॉ प्रेमचंद बैरवा कह्या के राज्य सरकार लारला 20 महीनां मांय दूदू हलका ने विकास री केई सौगाता दी है।

राज्यपाल हरिभाऊ बागडे आज जयपुर मांय कांस्टीट्यूशनल क्लब मांय राख्यी ज्या गणेश उत्सव कार्यक्रम मांय भाग लिना। इण दौरान वे गणेश मंदिर रा पुजारियां समेत न्यारा—न्यारा हलकां माय चोखा नतीजा देवा वाळा पढ़नियां अर प्रतिभावां रो मान कर्या। श्री बागडे कह्या के गणेश उत्सव पर्व ही नी है, यो सामाजिक एकजुटता अर आपसी भाईचारां री भारतीय संस्कृति रो प्रतीक है। वणा गणेश उत्सव समारोह

मनाया जाबा री परम्परां रा इतिहास रो जिक करता थकां कह्या के लोकमान्य तिलक महाराष्ट्र मांय इण भात रा आयोजनां री सरूआत समाज ने एकजुट करबा अर आजादी रा आंदोलन वास्ते लोगां मांय जाग जगाबा खातर करी ही।

प्रदेश मांय केई ठौड़ां माथे मॉनसून री बिरखा रो दौर जारी है। पाली जिला मांय आज हल्की सूं मध्यम बिरखा दर्ज व्ही। झुन्झुनूं अर राजधानी जयपुर मांय भी सुवांरे सूं रूक—रूक र बरसात रो दौर जारी है। सवाईमाधोपुर मांय बदळ गरजबा रे सागे तेज पाणी बरसबा सूं उमस सूं थोड़ी राहत मिली। सिरोही जिला मांय भी आज तेज बरसात रो दौर जारी है। बत्ती जाणकारी म्हाका खबरनवीस सूं —

हनुमानगढ़ जिला रा पीलीबंगा हलका रा विलौचा गांव मांय बिरखा री बजह सूं मकान री छत पड़बा सूं एक जणा री मौत व्हे गयी। मौसम केन्द्र जयपुर रे मुजब आज राज्य रा घणखर हलकां मांय मानसून सक्रिय रहबा सूं बादळ गरजबा रे सागे कठे—कठे मझळी सूं तेज बारिश व्हे सके है। आज सिरोही, पाली अर जालौर जिला खातर भारी बारिश रो ऑरेंज अलर्ट जारी कर्यो गयो है। इण रे अलावा बीकानेर, चूरू, गंगानगर अर हनुमानगढ़ ने छोड र बाकी 26 जिलां मांय येलो अलर्ट है।

वठिने आवता चार—पांच दिन पूर्वी राजस्थान रा कुछ एक हलकां मांय तेज बारिश अर कठे—कठे भारी बारिश होबा रा आसार है। वठिने जोधपुर अर बीकानेर संभाग री बत्ती ठौड़ां मांय भी आवता दो—तीन दिन मध्यम सू तेज बारिश होबा री आस है।

केंद्रीय खेल मंत्री डॉ. मनसुख मांडविया आज नई दिल्ली मांय **फिट इंडिया कार्यक्रम रे तैत संडे ऑन साइकिल** रैली मांय भाग लिया। रैली मांय पैली री बैडमिंटन खिलाड़ी तृप्ति मुरगुंडे, न्यारा—न्यारा राष्ट्रीय खेल महासंघ अर भारतीय खेल प्राधिकरण सूं जुड़्या खास लोग भेळा व्ह्या। श्री मांडविया कह्या के राष्ट्रीय खेल दिवस रे मौके तीन दिन रा खेल कार्यक्रम राख्या गया है। आज, देश भर मांय दस हजार सूं बत्ती ठौड़ां माथे 'संडे ऑन साइकिल' कार्यक्रम राख्या जा रह्या है। प्रदेश मांय भी केई ठौड़ां माथे साइक्लोथॉन राख्यो ग्यो। उदयपुर रा फतहसागर री पाल सूं साइक्लोथोन अर मैराथन व्ही। इण मांय खेल अर युवा मामला मंत्री मंत्री कर्नल राज्यवर्धनसिंह राठौड़ भी शामिल व्ह्या। खेल मंत्री साइकिल चला र प्रतिभागियां रो उच्छाव बढ़ाया। वठिने सवाईमाधोपुर मांय दशहरा मैदान सूं सर्किट हाउस होता व्ह्या काडी गयी साइकिल रैली मांय बड़ी संख्या मांय युवा अर पढ़नियां शामिल व्ह्या।

राधाष्टमी रो तिवांर प्रदेशभर मांय सिरधा अर उच्छाव रे सागे मनायो जा रह्यो है। जयपुर रा आराध्य श्रीगोविन्द देवजी मिंदर मांय इण मौके खास पूजा—अर्चना करी गयी। जैसळमेर मांय इण मौके पांच दिन रो धार्मिक अनुष्ठान चाल रियो है। उठिने, बूज हलका भरतपुर मांय भी इण मौके मिन्दरां मांय भजन—कीर्तन राख्या जा रह्या है। पाली मांय भी मिन्दरां मांय राधा जन्मोत्सव री झांकियां सजाई गई हैं। सवाईमाधोपुर रा खंडार मांय इण मौके मेळो भर्यो है, जिण मांय भाग लेबा खातर बड़ी संख्या मांय सिरधालू पूग रह्या है। पुष्कर मांय काल सूं सावित्री माता रो सालाना मेळो सरू व्ह्यो जिण मांय थानीय अर दूर दराज सूं आयी महिलावां पूजा अर्चना कर री है। अलवर जिला रा सरिस्का हलका मांय

बण्या प्राचीन भूर्तहरी मन्दिर मांय मेळो भर्यो है। लोक देवता बाबा भूर्तहरी रा दर्शनां खातर तङ्के सूं
ही सिरधालू अठे पूग रिया है।
